

# **ESTATUTOS DE GALIZA NOVA**

**30 ANOS DE LOITAS:  
PASADO, PRESENTE, FUTURO**

**30** ANOS



**24 de novembro de 2018  
Santiago de Compostela**

## CAPÍTULO I: DE GALIZA NOVA

*Art. 1.-* GALIZA NOVA, Organización da Mocidade do BNG, é unha organización xuvenil que asume como as súas funcións básicas o deseño e posta en práctica dunha política xuvenil nacionalista, de cara a vertebrar un movemento xuvenil galego comprometido coa liberación nacional e a transformación da nosa sociedade.

*Art. 2.-* GALIZA NOVA asume como propio o programa da fronte patriótica Bloque Nacionalista Galego, constituíndose na teoría e na práctica política na Organización Xuvenil ou Mocidades do BNG, elaborando e desenvolvendo neste marco o seu programa de actuacións específicas.

*Art. 3.-* GALIZA NOVA vincúlase ao BNG ao abeiro do disposto no “Protocolo de relación e integración da mocidade na estrutura frontista do BNG”. GALIZA NOVA é, pois, unha organización integrada no BNG, dotada de órganos de dirección, finanzas e personalidade xurídica propios e diferenciados.

*Art. 4.-* GALIZA NOVA recoñece a pluralidade ideolóxica existente no BNG e neste sentido adoptará os mecanismos oportunos que tendan a un recoñecemento explícito desta. En particular, recoñécese o dereito á constitución de tendencias organizadas no seo da Organización e a posibilidade de establecer as medidas necesarias para o seu recoñecemento e desenvolvemento dentro do marco organizativo e de dirección propio de GALIZA NOVA.

## CAPÍTULO II: DAS AFILIADAS E DOS AFILIADOS

**Art. 5.-** Poderá ser militante de GALIZA NOVA calquera moza ou mozo, menor de 30 anos, que así o desexe e que acate os principios propios da Organización e estes Estatutos. A petición de entrada farase sempre de xeito individual, sendo a Dirección Comarcal o órgano que procederá a dar entrada no ámbito da súa comarca. Para os casos de afiliación colectiva será necesario o ditame favorábel da Dirección Nacional, reunida en sesión extraordinaria.

A admisión formal das solicitudes de alta en Galiza Nova farase pola Asemblea Comarcal correspondente constando en acta. A proposta de afiliación dun novo membro debe ser avalada, cando menos, por dous militantes de Galiza Nova. En caso da persoa interesada non coñecer ningún membro de Galiza Nova que a puidera avalar, a Dirección ou Asemblea Comarcal concertará unha entrevista con ela para obter a información necesaria da mesma e exporlle o ideario político e normas de funcionamento da organización. A Asemblea Comarcal poderá proceder así en cada caso que considere preciso. En calquera caso as peticións de alta en Galiza Nova serán tratadas e resoltas na primeira reunión ordinaria da Asemblea Comarcal.

Causarán baixa en Galiza Nova, para alén de polas razóns disciplinarias contempladas nestes estatutos, todas as persoas afiliadas a Galiza Nova que, sen causa xustificada, non satisfagan a cota estipulada. Cando unha persoa afiliada a Galiza Nova estiver 6 meses sen abonar a cotización recibirá por escrito unha comunicación certificada dándolle o prazo dun mes para pórse ao día, cumprido o cal sen o facer causará baixa. Se unha persoa afiliada, por razóns económicas, non puider satisfacer a cota estipulada, debe comunicar esta situación á Asemblea Comarcal, quen, á vista dos datos, pode reducirlle a cota ou eximila temporalmente do deber de cotizar.

Toda persoa afiliada a Galiza Nova debe estar adscrita a unha única Asemblea Local e Comarcal en que exercerá o seu dereito a voto, sen prexuízo de poderen asistir eventualmente e sen dereito a voto ás reunións doutra Asemblea Comarcal ou Local aquelas/es afiliadas/os con mobilidade de residencia ao longo do ano por razóns diversas. Galiza Nova é unha organización unitaria, xa que logo, se unha Asemblea Comarcal denega unha petición de alta ou decide dar de baixa a unha persoa afiliada, esta non pode ingresar deseguido noutra Asemblea Comarcal. En caso de conflito competencial entre comarcas, será a Dirección Nacional quen decida, cabendo tamén recurso perante a Comisión de Garantías e en última instancia perante a Asemblea Nacional.

Galiza Nova entregará copia das fichas das súas militantes aos consellos comarcais do BNG respectivos e comunicará por escrito, no momento de producírense, os movementos de altas, baixas e traslados da súa afiliación; movementos dos que, á súa vez, os Consellos Comarcais deberán dar conta aos organismos nacionais do BNG. Os consellos comarcais do BNG están capacitados para non admitir unha alta de Galiza Nova no caso de haber evidencias de que a persoa interesada ten posicións contraditorias coas definidas no Programa e Estatutos do BNG. Ademais disto, cada Asemblea Comarcal debe ter un libro de altas e baixas no local comarcal, con copia das fichas completas da militancia.

**Art. 6.-** Son dereitos das militantes:

- a) Contribuír a definir a orientación política de GALIZA NOVA, participando en todos os debates que se dean no seo da Organización.
- b) Elixir e ser elixida para os órganos de dirección da Organización.
- c) Criticar dentro dos órganos dos que faga parte calquera membro ou órgano de GALIZA NOVA.
- d) Recibir axuda en caso de problemas derivados da súa pertenza a GALIZA NOVA.
- e) Recibir formación, información e propaganda da Organización.
- f) Ser escoitada polo órgano pertinente en proceso disciplinar aberto contra a súa persoa.

- g) Empregar os medios materiais dos que dispón a Organización.
- h) Participar plenamente es todas as estruturas e organismos do BNG.
- i) Participar nas actividades desenvolvidas por GALIZA NOVA ou polo BNG.
- k) Discrepar publicamente dos acordos tomados por GALIZA NOVA, sempre que isto non signifique boicotear a súa execución ou atentar contra a unidade de Organización.
- l) Promover a constitución de tendencias no seo de GALIZA NOVA.
- m) Calquera outro derivado da súa militancia no BNG.

**Art. 7.-** Son deberes das militantes:

- a) Empregar o idioma galego e defender a nosa cultura.
- b) Respear as canles orgánicas.
- c) Espallar a propaganda da Organización.
- d) Cumprir co traballo que se lle encomende.
- e) Cotizar coa cota que se marque.
- f) Posibilitar a execución dos acordos tomados en GALIZA NOVA.
- g) Cumprir e acatar os estatutos de GALIZA NOVA.
- h) Participar nos movementos de masas apoiados pola nosa organización.

**Art. 8.-** Son causas de sanción dunha ou dun militante:

- a) Boicotear a posta en práctica das decisións maioritarias da Organización.
- b) Actuar contrariamente ao programa e ás resolucións da Asemblea Nacional.
- c) Manter actitudes ou prácticas que danen a Organización.

**Art. 9.-** Os acordos e sancións serán tomados polos órganos de dirección dun nivel superior ao organismo onde se encontre militando a ou o militante. No caso das e dos membros das Dirección Nacional, os acordos serán tomados pola propia Dirección Nacional.

En virtude da gravidade dos actos que se sancionen as medidas que se poderán adoptar son:

- a) Advertencia da sanción.
- b) Censura.
- c) Destitución dos cargos que ocupa, no seu caso. Esta destitución terá carácter temporal até que se reúna o órgano que o elixiu.
- d) Suspensión da militancia.
- f) Expulsión de GALIZA NOVA.

**Art. 10.-** Os acordos sinalados no artigo anterior poderán ser recorridos diante do órgano inmediatamente superior ao que tomou o acordo e, en última instancia, diante da Dirección Nacional. En calquera caso, este proceso non significa a paralización do acordo tomado até que haxa unha resolución superior.

**Art. 11.-** A afiliada ou o afiliado causará baixa por calquera dos seguintes motivos:

- a) Petición propia, presentada por escrito perante a correspondente Asemblea Comarcal.
- b) Deixar de cotizar durante seis meses.
- c) Perda das condicións requiridas nos presentes Estatutos.
- d) Por expulsión validamente acordada nos órganos competentes.

**Art. 12.-** A Asemblea Nacional ou, no seu caso, a Dirección Nacional, poderán nomear unha Comisión de Garantías ou de resolución de conflitos. Estará integrada por 5 persoas: unha designada pola Asemblea Nacional de Mulleres, outra pola Asemblea Nacional LGBT, e as tres restantes escollidas pola Dirección Nacional en base ás propostas elaboradas polas Asembleas Comarcais.

## CAPÍTULO III: DOS ÓRGANOS DE GALIZA NOVA

**Art. 13.-** GALIZA NOVA contará cos seguintes órganos:

- a) Asemblea Nacional.
- b) Dirección Nacional.
- c) Comisión Permanente da Dirección Nacional.
- d) Asemblea Comarcal
- e) Asemblea Local

**Art. 14.-** A Asemblea Nacional é o máximo órgano de decisión de GALIZA NOVA; nela teñen dereito a participar todas as militantes dados de alta no prazo e forma decididos pola Dirección Nacional. A Asemblea Nacional celebrarase de xeito ordinario cada dous anos, habendo ser convocada pola Dirección Nacional con, cando menos, tres meses de antelación.

**Art. 15.-** A Asemblea Nacional extraordinaria convocarase por acordo da Dirección Nacional a iniciativa propia ou a petición dun terzo da militancia, sendo convocada con, cando menos, un mes de antelación. Esta Asemblea Nacional só se poderá pronunciar sobre os temas obxectos na mesma.

**Art. 16.-** Son funcións da Asemblea Nacional:

- a) Definir a orientación política da Organización.
- b) Analizar, debater e, no seu caso, aprobar o informe presentado pola Dirección Nacional saínte.
- c) Aprobar e revisar os Estatutos da Organización
- d) Elixir as e os membros da Dirección Nacional que lle corresponda e, de entre estas e estes, a Secretaría Xeral.

**Art. 17.-** A Dirección Nacional é o órgano que dirixe a actividade de GALIZA NOVA no tempo que transcorre entre dúas Asembleas Nacionais, e está encargada de executar os acordos adoptados pola Asemblea Nacional.

**Art. 18.-** A Dirección Nacional está formada por unha representación da Asemblea Nacional igual ao número de agrupacións comarcais definidas pola Asemblea Nacional e por un representante elixido por cada Asemblea Comarcal. Cando unha representante cause baixa da Dirección Nacional será substituída, ordenadamente, pola listaxe de suplencia das representantes da Asemblea Nacional.

**Art. 19.-** Cada membro da Dirección Nacional terá unha función específica da que renderá contas diante do mesmo órgano.

**Art. 20.-** A Dirección Nacional reunirse ordinariamente cada tres meses e de maneira extraordinaria a petición dun terzo das e dos membros da Permanente. A Dirección Nacional será convocada pola Secretaría Xeral, nominalmente e por escrito e cunha semana de antelación.

**Art. 21.-** Son funcións da Dirección Nacional:

- a) Dirixir o traballo político e de organización de GALIZA NOVA de acordo coa orientación definida na Asemblea Nacional.
- b) Convocar as Asembleas Nacionais ordinarias e extraordinarias, así como elaborar os documentos a debater nelas.
- c) Elaborar as propostas de actuación e recoller e analizar as demandas da base da Organización.
- d) Decidir sobre propostas colectivas de afiliación, adhesión ou integración.

- e) Elixir a Permanente, podendo mudar, no seu caso, calquera das ou dos seus membros, excepto a responsabilidade de Mulleres.
- f) Controlar o funcionamento e fiscalizar o traballo da Permanente.
- g) Definir as relacións con outras organizacións a nivel nacional e internacional.
- h) Planificar os recursos financeiros e aprobar o Orzamento Anual da Organización.
- i) Estabelecer a contía de cota de afiliación.
- l) Nomear comisións, coa composición e atribucións que considere pertinentes.
- m) Elaborar e aprobar o seu regulamento de funcionamento interno.
- n) Elixir a coordinadora do Servizo Nacional de Publicacións.
- ñ) Interpretar os presentes Estatutos e resolver en caso de dúbidas en materia estatutaria.
- o) A creación, supresión, fusión e participación de agrupacións comarcais.
- p) Transmitir ao BNG propostas de actuación social e institucional.
- q) Render contas diante da Asemblea Nacional da súa xestión.
- r) Xerar contidos formativos e fixar actividades nacionais de formación.

**Art. 22.-** A Comisión Permanente está formada por 11 persoas, 9 delas serán escollidas de forma directa pola Asemblea Nacional e corresponderán coas 9 primeiras da candidatura á Dirección Nacional.

No caso de haber varias listas para a Dirección Nacional, a cada unha delas corresponderanlle un número de postos dos 9 a cubrir na Comisión Permanente directamente proporcional ao número de votos obtidos, e serán ocupados seguindo a orde de lista. Se a lista máis votada supera o 50% dos votos a persoa que encabece ocupará a Secretaría Xeral. No caso contrario, haberá unha segunda volta para escoller a Secretaría Xeral entre as persoas que encabecen as dúas listas máis votadas.

As Responsábeis Nacionais da Asemblea de Mulleres e da Asemblea LGBT incorporaranse á Comisión Permanente e á Dirección Nacional con voz e voto.

A Comisión Permanente contará, a maiores da Secretaría Xeral, cando menos coas seguintes responsabilidades: Responsábel de Organización, Responsábel de Finanzas, Responsábel da Asemblea de Mulleres, Responsábel da Asemblea LGBT, Responsábel Institucional, Responsábel de Formación, Responsábel de Relacións Internacionais, Responsábel de Publicacións e Responsábel de Comunicación.

**Art. 23.-** Son funcións da Permanente:

- a) Dar resposta a calquera problema ou feito de importancia que se presente entre reunións da Dirección Nacional.
- b) Executar as decisións acordadas pola Dirección Nacional.
- c) Facer un seguimento constante das actividades da Organización, traballando a todos os niveis polo seu asentamento organizativo.
- d) Convocar as xuntanzas da Dirección Nacional e da Comisión Nacional de Organización, presentándolle as propostas que considere oportunas.
- e) Coordinar o funcionamento de todos os órganos de GALIZA NOVA, a fin de garantir a operatividade do conxunto da Organización.
- f) Propor a actividade formativa.
- g) Aprobar os contidos do voceiro MOCIDADE.
- h) Promocionar a proxección pública nos medios de comunicación, e atender todo o relacionado coa propaganda.
- i) Atender as relacións coas institucións.
- l) Xestionar as finanzas nacionais, planificar o patrimonio e facer seguimento das transferencias.
- m) Operar con entidades bancarias, solicitar créditos, abrir e cancelar contas; alén das potestades nese sentido dos órganos comarcais e locais.
- n) Exercer o control nacional mensual de finanzas.
- ñ) Elaborar o parte nacional mensual de finanzas.

- o) Exercer solidariamente a representación xurídica, legal e económica de GALIZA NOVA, delegando na Secretaría Xeral a representación global.
- p) Todas aquelas que lle delegue a Dirección Nacional, excepto as recollidas nos puntos b), d), e), f), g), h), i) e o) do artigo 20.

**Art. 24.-** A Permanente reunirse ordinariamente cada quince días, e extraordinariamente cando as circunstancias o requiran. Convocará a Secretaría Xeral, podendo partir a iniciativa de calquera das ou dos seus membros.

**Art. 25.-** Existirá un departamento dependente da Permanente denominado Servizo Nacional de Publicacións. A Dirección Nacional elixirá de entre os seus membros a coordinadora deste servizo.

**Art. 26.-** Son funcións do Servizo Nacional de Publicacións as derivadas do traballo propagandístico, dos aspectos técnicos do voceiro MOCIDADE, da impresión das circulares internas e de todos aqueles traballos deste tipo que lle encomende a Permanente. Así mesmo, deberá publicar, baixo a dirección da propia Permanente, os documentos resultantes das Asembleas Nacionais no prazo máis breve posíbel. Do mesmo xeito, este servizo asesorará e promoverá a edición de voceiros e revistas de carácter local e comarcal.

**Art. 27.-**

**1.-** Son funcións da Secretaría Xeral:

- a) Representar publicamente a Organización.
- b) Representar GALIZA NOVA nos órganos de dirección do BNG.
- c) Convocar as reunións dos órganos de dirección.
- d) Levar un seguimento da actividade política.
- e) Coordinar o traballo da Permanente.

**2.-** Son funcións da Responsábel de Organización:

- a) Levar o seguimento da situación organizativa.
- b) Promover a expansión organizativa e o espallamento en xeral do proxecto de GALIZA NOVA.

**3.-** Son función da Responsábel de Finanzas:

- a) Levar o seguimento continuo da situación financeira.
- b) Ocuparse das finanzas de GALIZA NOVA seguindo as directrices do capítulo V destes Estatutos.

**Art. 28.-** GALIZA NOVA estrutura o seu labor sectorial nas seguintes áreas de traballo:

- a) Universidade.
- b) Ensino Medio.
- c) Cultura.
- d) Feminismo.
- e) LGBT.
- f) Ecoloxismo.
- g) Antimilitarismo e Pacifismo.
- h) Emprego.
- i) Asociacionismo.

**Art. 29.-** GALIZA NOVA estrutúrase en localidades e comarcas, e os seus organismos de base son as Asembleas Locais e Comarcais, que se reunirán á convocatoria da Responsábel Local ou Comarcal.

*Art. 30.-* As Asembleas Comarcais reuniranse cunha periodicidade ordinaria de dous meses. As Asembleas Locais reuniranse como mínimo unha vez ao mes. Terán como funcións debater e analizar a situación da localidade, da comarca e a nivel nacional, e elaborar liñas de traballo a desenvolver por GALIZA NOVA na localidade, na comarca e na Galiza. As Asembleas Locais e comarcais estarán compostas por todas e todos os militantes desa localidade ou comarca.

*Art. 31.-* Cada localidade contará coas comisións de traballo que estime oportuno constituír, tendo en conta as características, circunstancias e prioridades que presente. As e os militantes de GALIZA NOVA integraranse en cada localidade no sector onde se desenvolverá o seu traballo político, sen prexuízo da súa colaboración con outros sectores.

*Art. 32.-* A Dirección Comarcal estará composta polas responsábeis locais das distintas Asembleas Locais que conforman a comarca, a Responsábel Comarcal, a Vicerresponsábel Comarcal, a Responsábel de Finanzas, as militantes da comarca membros da Dirección Nacional e por calquera outro militante que así o estime oportuno a Asemblea Comarcal.

*Art. 33.-* Onde se considere preciso, poderase formar a Dirección Comarcal, que se reunirá con periodicidade mensual. As súas funcións serán as de coordinar o traballo político a nivel comarcal a calquera tema que poida xurdir. Prestarán especial atención á expansión organizativa no ámbito da súa comarca.

*Art. 34.-* As Asembleas Locais e Comarcais poderanse dotar dun regulamento interno que en ningún caso poderá entrar en contradicións cos presentes Estatutos e que será coñecido pola Permanente.



## CAPÍTULO IV: DA ASEMBLEA DE MULLERES DE GALIZA NOVA

*Art. 35.-* A Asemblea Nacional de Mulleres é o máximo órgano de decisión en temas de feminismo de GALIZA NOVA, inmediatamente por debaixo da súa Asemblea Nacional.

*Art. 36.-* Fan parte da Asemblea de Mulleres as militantes de Galiza Nova

*Art. 37.-* A Asemblea Nacional ordinaria de Mulleres reunirase cunha periodicidade semestral, convocada pola Mesa Nacional cun mes de antelación. A Asemblea Nacional extraordinaria celebrarase cando así o solicite calquera Asemblea Comarcal e/ou a Mesa Nacional.

*Art. 38.-* A Asemblea de Mulleres de GALIZA NOVA contará cunha Mesa Nacional integrada pola Responsábel Nacional, Responsábeis Comarcais, Responsábel de Finanzas, Responsábel de Boletín e outras responsabilidades que se estimen convenientes.

*Art. 39.-* A Mesa Nacional reunirase trimestralmente.

*Art. 40.-* A Asemblea de Mulleres estruturarase en localidades e comarcas, sendo os seus organismos as Asembleas Locais e Comarcais.

*Art. 41.-* Fan parte da Asemblea Local e Comarcal de Mulleres as mozas militantes que voluntariamente o decidan.

*Art. 42.-* As Asembleas Comarcais de Mulleres reuniranse cunha periodicidade trimestral. As Asembleas Locais reuniranse, como mínimo, unha vez ao mes.

*Art. 43.-* Cada Asemblea Comarcal e Local poderá contar coas Mesas Comarcais e Locais que estime oportuno constituír.

## CAPÍTULO V: DA ASEMBLEA LGBT DE GALIZA NOVA.

*Art. 44.*- A Asemblea Nacional LGBT é o máximo órgano de toma de decisións neste eido en GALIZA NOVA, inmediatamente por debaixo da súa Asemblea Nacional.

*Art. 45.*- Fan parte da Asemblea LGBT as militantes LGBT de Galiza Nova que así o desexen.

*Art. 46.*- A Asemblea Nacional LGBT ordinaria reunirase semestralmente, contando cunha xuntanza previa da Mesa Nacional cun mes de antelación. A asemblea Nacional LGBT extraordinaria terá lugar cando se solicite por calquera Asemblea Comarcal e/ou a Mesa Nacional.

*Art. 47.*- A Asemblea LGBT contará cunha Mesa Nacional formada por 5 militantes, unha das cales deberá ser a Responsábel Nacional. Poderán crearse outras responsabilidades se se estimase oportuno.

*Art. 48.*- A Mesa Nacional LGBT reunirase trimestralmente.

*Art. 49.*- A Asemblea LGBT estrutúrase en localidades e comarcas, sendo os seus organismos as Asembleas Locais e Comarcais.

*Art. 50.*- Fan parte das Asembleas Locais e Comarcais LGBT as militantes LGBT que voluntariamente o decidan.

*Art. 51.*- As Asembleas Comarcais LGBT reuniranse cunha periodicidade trimestral. As Asembleas Locais reuniranse mensualmente.

*Art. 52.*- Cada Asemblea Comarcal e Local poderá contar coas Mesas Comarcais e Locais que estime oportuno constituír.

## CAPÍTULO VI: DAS FINANZAS

**Art. 53.-** GALIZA NOVA ten un patrimonio propio que administrará segundo as disposicións deste capítulo. O financiamento da Organización provirá de:

- a) As cotas da militancia.
- b) Os incrementos patrimoniais a título gratuito e subvencións, do tipo que sexan.
- c) A venda de publicacións ou calquera outro ben a nivel nacional.
- d) O endebedamento a través de créditos.
- e) Calquera outra fonte aprobada pola Dirección Nacional.

**Art. 54.-** As subvencións solicitadas ou concedidas a calquera nivel organizativo serán coñecidas pola Permanente, que renderá contas diante da Dirección Nacional.

**Art. 55.-** As Asembleas Comarcais cubrirán trimestralmente un parte de finanzas comarcal no que figurarán ingresos e gastos, transferencias á Caixa Nacional, saldo e demais detalles financeiros, segundo o modelo que aprobe a Dirección Nacional. A copia deste parte mandarase á ou ao Responsábel de Finanzas.

**Art. 56.-** Existirá un parte de finanzas nacional que recollerá os movementos financeiros da Caixa Nacional. A Permanente exercerá o control deste parte. Calquera membro da Dirección Nacional e da Comisión de Organización e Finanzas poderá coñecer o estado financeiro de GALIZA NOVA. En calquera caso, a Permanente fará coñecer á Dirección Nacional o estado global das contas da Organización.

**Art. 57.-** Existirá un libro nacional de finanzas baixo a Responsabilidade de Finanzas, onde figurarán datadas todas as transaccións realizadas a nivel nacional, co correspondente anexo de facturas e xustificantes.

**Art. 58.-** Perante a dirección Nacional darase conta da situación xeral das finanzas e do cumprimento dos obxectivos neste campo. A Dirección Nacional aprobará un orzamento anual para a Organización durante o período do exercicio económico de referencia.

**Art. 59.-** Establécese o seguinte sistema distributivo do total das cotizacións recadadas nun trimestre:

- o 50% dos ingresos por cotizacións por cada Asemblea Local pasará a engrosas a Caixa Nacional.
- o 50% dos ingresos por cotizacións por cada Asemblea Local pasará a engrosar a Caixa Local ou Comarcal, segundo o caso e na porcentaxe que marquen os organismo locais e comarcais.

**Art. 60.-** Cada Asemblea Local ou Comarcal poderá contar coa súa propia Caixa.

**Art. 61.-** A distribución das cotas recadadas está en función do número de militantes de cada localidade ou comarca e do conxunto da Nación. Polo tanto, actualizarase o listado de militantes de cada comarca en cada reunión da Asemblea, obtendo así a cifra exacta que cada comarca deberá aportar á Caixa Nacional en cada trimestre.

**Art. 62.-** A permanente dotarase dun inventario de bens e patrimonio propiedade de GALIZA NOVA a nivel nacional, que irá actualizando.

**Art. 63.-** Aínda que a contía das cotas ordinarias coincidirá co disposto en cada momento pola Dirección Nacional, existirá de xeito voluntario unha cotización extraordinaria das e dos militantes.

## CAPÍTULO VII: DAS RELACIÓNS CO BNG

**Art. 64.-** Ao abeiro do disposto no “Protocolo de Relación e Integración de Organización da Mocidade na estrutura Frontista do BNG” GALIZA NOVA ten dereito a:

- a) Estar representada en todos os órganos de dirección do BNG (Executiva, Consellos Nacional, Comarcal e Local). A Secretaría Xeral e as Responsábeis Comarcais e Locais serán os máximos responsábeis da representación de GALIZA NOVA nos órganos do BNG. No seu defecto, que a Asemblea pertinente decida. Se unha comarca do BNG abrangue máis dunha de GALIZA NOVA ou viceversa, serán as Asembleas Comarcais implicadas as que arbitren as medidas necesarias para garantir a representación.
- b) A consideración das súas e seus militantes como militantes de pleno dereito do BNG, escusándose de contribuír ás cotizacións.
- c) Estar presente e ser tida en conta nos programas e planificacións organizativas que o BNG leve a cabo.
- d) Actuar como organización autónoma do BNG para a elaboración teórica e a intervención práctica na especificidade da política xuvenil, sendo responsábel do desenvolvemento do proxecto político para o colectivo xuvenil.

**Art. 65.-** GALIZA NOVA procurará acordar todo tipo de acordos co BNG a nivel nacional, comarcal e local, tendentes ao usufruto mutuo da infraestrutura que se posúa e ao financiamento do traballo político de GALIZA NOVA.

**Art. 66.-** GALIZA NOVA promoverá a implicación e integración da súa militancia en todas as estruturas do BNG.

## CAPÍTULO VIII: DAS NORMAS DE FUNCIONAMENTO

**Art. 67.-** Os acordos de calquera órgano local, comarcal ou nacional adoptaranse por maioría simple, salvo nos casos doutro xeito regulados nestes Estatutos ou nos Regulamento de Funcionamento Interno do órgano en cuestión.

**Art. 68.-** As xuntas de calquera órgano consideraranse validamente constituídas en primeira convocatoria cando asistan a metade máis un dos seus membros, sempre que á reunión fosen convocadas todas as compoñentes do órgano, comunicándolles hora, data, lugar e orde do día con, cando menos, corenta e oito horas de antelación. En segunda convocatoria media hora máis tarde se, sexa cal for o número de asistentes, e sempre que o acorden por maioría simple. Non se considerará válida a ningún feito calquera reunión, nin acordos tomados nela, que non se fagan segundo o disposto nos presentes Estatutos.

**Art. 69.-** De cada reunión dos distintos órganos, levantarase acta, na que constarán os asistentes, os acordos adoptados e as anotacións realizadas, debendo reflectir as intervencións que sexan solicitadas. As actas da Permanente, Dirección Nacional e Comisión Nacional de Organización serán coñecidas polos órganos de base.

**Art. 70.-** As eleccións para calquera responsabilidade faranse mediante voto secreto, sempre que concorran máis dunha persoa ou solicite algunha das ou dos asistentes.

## DISPOSICIÓN XERAIS

**PRIMEIRA.**- A modificación dos presentes Estatutos corresponde en exclusiva á Asemblea Nacional, e a súa interpretación á Dirección Nacional.

**SEGUNDA.**- As organizacións ou colectivos xuvenís de ámbito local, comarcal ou nacional, poderán establecer fórmulas de asociación con GALIZA NOVA. O acordo de adhesión debe ser aprobado pola Dirección Nacional. Os termos organizativos, económicos ou de calquera tipo estableceranse no propio acordo de adhesión, debendo este ser ratificado pola Asemblea Nacional.

**TERCEIRA.**- O proceso de eleccións internas ordinarias na estrutura de GALIZA NOVA realizarase con posterioridade á celebración da Asemblea Nacional, de cara a adaptala ás posibles modificacións que a Asemblea Nacional acorde nos Estatutos.

**CUARTA.**- Os Estatutos do BNG serán, en todo caso, supletivos aos presentes.

## DISPOSICIÓN DERRADEIRA

**ÚNICA.**- Fican derogadas as anteriores normas Estatutarias.